

Dedica na su mama stima

'Bautismo di CD "Mama" di "Lady Ruth" a tuma lugar diahuebs mainta



ORANJESTAD (AAN) -- Den un ambiente sumamente agradable na su cas, a tuma lugar ayera e bautismo di e CD "Mama", produci pa e poëta señora Ruthy Vrieswijk, artísticamente conoci como "Lady Ruth".

E musica di fondo ta e conocido cancion "Pa Ma" skirbi pa e tata di cultura di Aruba señor Padu del Caribe, pero interpreta riba piano pa señor Emile Kelkboom.

Mayoria di e poemanan ta interpreta pa "Lady Ruth" na nos dushi Idioma Papiamentu, cu excepcion di un poesia na Ingles "Mama" skirbi y declama pa señora Maureen Leenheer-Vieira, poëta invita den e CD, un na Spaño "Mamá te hecho de menos", skirbi pa Mercedes Abdul y interpreta pa sra. Maureen Leenheer-Vieira, y un na Hulandes di e autor señora Mercedes Beaujon, conoci como "Tanje Siekie" y cu ta worde recita pa "Lady Ruth".

E fecha 10 di april ta nifica hopi pa Ruthy, pa motibo cu riba e fecha aki su Mama stima señora Mercedes Bergen-Tromp ta cumpli añu, y el a dedica e disco compacto aki na dje.

E CD ta contene 24 poema tur riba e tema di "Mama", y tin cu palabranan hopi profundo y sentimental te cu contenido un tiki abstracto dedica na e mamanan moderno.

Señora Mercedes Bergen-Tromp a efectua e bautismo di

e CD, cual a bay na un manera hopi original, door di basha aroz y puiro di sopi di fideo, como simbolo di un dushi cuminda bon traha manera mamanan sa haci, cu e ingrediente principal cu ta nan amor. "Lady Ruth" tabata tin palabranan di gradicimento pa

tur persona cu a coopera cun'e, sin laga su casa afo, y cu a haci posible pa e produccion bunita aki a worde realiza, y cu e por ta riba mercado prome cu Dia di Mama.

Riba combinacion di potret por observa e momento cu e bautismo di e CD a tuma lugar.

DIARIO. - (11 APRIL 2003), P. 25